

靈寶領教濟度金書卷

一百十五之
一百十六

坐十

靈寶領教濟度金書卷之一百十五 一百十六同卷 坐

洞微高士開光救苦真人竊全真授

靈寶通玄弘教水南先生林靈真編

科儀立成品 血湖道場用

冥官醮儀

步虛 洒淨

請稱法位

具位某謹上啓

北陰玄天
豐都大帝
東嶽天齊仁聖帝
地府十宮真君
溟泠大神
五道大神
九幽地獄主

者大鐵圍山無間碓石血湖地獄主者血湖
掌罪籍寃對冥官翻體大神擲尸大神食心
啖腦鬼王某州社令尊神本州本縣城隍主
者當境土地里域主者遠近廟貌祀典神祇
齋主家土地司命六神一切威靈伏以清微

坐十

御極羅敷三洞之慈雲赤明開圖煥耀十華
之慧日拯死魂於北鬱鍊生魄於南昌恩浹
千生仁同一視茫茫苦海孰砥柱於迷津杳
杳血湖曷津梁於彼岸玉籙侈度人之典金
章勒司殺之曹昭天漏泉雖荷元皇之德澤

承流宣化猶資冥職之慈悲庸即玄壇爰伸
禱祀靈光洞煥開八極之陽春神馭駢羅離
九幽之長夜不違丹悃剋赴清筵法衆運誠
志心奉請

請神

初獻

散花

其上啓

北陰玄天豐都大帝東嶽天齊仁聖帝地府
十宮真君溟泠大神五道大神地司列曹冥
官主職州縣城隍當境土地醮筵内外一切

真靈伏以清都紫府陽光儼先聖之居黑壤
黃泉陰暗號鬼神之宅受中免分於迷悟生
神遂判於升沉十宮六洞之森嚴班聯赫奕
五苦三塗之沉滯憲令昭彰惟血湖之幽牢
連鐵圍之朔境業風振蕩產魂顛冥飲穢吞

坐十

二

腥考訊無論於貴賤含冤茹苦拘囚莫記於
春秋不聞三寶之名求隔九清之境雖繇報
對實累生成帝矜祖炁之分靈忍置陶鎔之
外神稟天符而度命悉歸膏澤之中伏願體
道好生法天救死霽雷霆之怒刀化樹而劍

爲騫敷雨露之恩永靜波而火息焰終藉三
天之蔭獲超九地之幽除罪簿滅惡根契度
人於十轉開生門塞死戶符救苦於十華請
命勤渠陳詞激切其不勝虔祝之至謹當亞
獻

酌酒

散花

其上啓

北陰玄天
豐都大帝
東嶽天齊仁聖帝地府
十宮真君
溟泠大神
五道大神
地司列曹冥
官主職州縣城隍當境土地醮筵內外一切

威靈伏以大哉乾至哉坤極資死資生之效
保其神貴其炁成唱恭唱奉之功兩平合而
天粹混成二五凝而神光爛若既獲胚彈之
種子皆期橐籥以成人何十月之末周胞胎
遽殞或百粹之尚遠母子俱亡驚神識之沉

坐十

三

淪歎穢腥之陷溺終天負痛扣地儔矜雖三
生之寃業使然亦一念之根塵致爾血池浩
蕩聖經已迷其寒心幽域淒涼帝赦徒煩於
側耳非由曲度曷副私祈今齋主某伏爲亡
故某崇建玄壇敷陳素悃金真演教植萬劫

之津梁玉匱告齋開九幽之徑路朱章露奏
玉簡風飛請三元以流光告三元而赦罪願
遵帝旨慨歛靈威凡係薦之真魂與見禁之
囚爽普消業債俾出冥途淨尸魄而部衛形
魂斬根伐滯復元神而超凌溟滓受化更生
悉由提拯之恩敢昧獻酬之敬謹伸終莫

終獻

散花

禮周三獻詞不再陳元始玉符謹當告下

告符

飛空步虛頌

宣疏

某謹重誠上啓醮筵內外合座威靈伏以無
私覆無私載之恩不言善應不在大不在小
之罪與物爲春惟元始之真符實幽關之
赦扣地扃而誕布驛吏星馳奉天命而對
冥曹雷動望回惠澤普濟幽靈時刻升遷賴
侍衛送迎之力天人欣慶無拘留逼合之憂
莫獻有彝忱恂可罄恪祈洪造永翊玄風某
不勝瞻戀之至謹當奉送

復爐

回輦頌

送聖

向來

關血湖燈破獄儀

步虛

洒淨

坐十

焚降真召靈符

具位臣某謹焚香供養

太上无極大道虛无自然元始天尊妙无上

帝虛皇玉晨大道君妙有上帝萬變混沌玄

元老君至真大帝東極青玄老君太乙救苦

天尊運明保元上帝无上元皇上帝南極真
王朱陵大帝玉清真王長生大帝九微太真
青童大道君靈虛玉女丹皇大道君迴風混
合九霄玉帝道君无上度人三十二炁玉帝
道君五靈五老五炁天君天地水三官帝君
中天九皇上真道君上清靈寶五師真君三
天門下泰玄樞機三省列相天君大慈大悲
救苦真人大惠真人普救真人普度真人南
宮度人不死尊神度世司馬大神好生韓君
丈人迴骸起死監生大神三洞四輔經籙法

中高真上聖流傳至教經籍度師名山洞府
考較真仙北陰玄天酆都大帝東嶽天齊仁
聖帝三界應感宣德承符一切威靈仗此寶
香普同供養伏以精粹混疑一炁運無形之
表玄黃剖判三靈開有物之先陽運乾而陰

坐十

五

運坤明爲人而幽爲鬼顛躋塵路鑿混沌以
蕩百神報對冥關隨輪轉而迷一性矜唱奉
敬順之質忘保身貴炁之方因胞胎而蕩生
茫茫慾海致形神而趨死渺渺血湖扣地誰
矜終天莫籲是以元皇流光於三炁清微破

暗於五元玉匱啓齋金真演教俾脫塗炭而
處衽席鶴赦昭宣爲作砥柱而植津梁龍恩
曠蕩爰啓然燈之式庸資度命之功今齋主
某伏念亡故某溥及十方一切產魂受質女
身驚心宿命四大修罹於產厄五神或滯於
血尸恭潔玄壇肅揚清範神燈朗耀開九幽
不夜之天寶炬騰輝幻四澤長春之景伏願
衆真矜憫列聖垂憐舒靈寶之妙光煥朔單
之慧燭重昏遇朗耀血池變作清涼幽暗沐
陽和陰境化爲天界傾心接引穩步逍遙臣

不勝瞻望懇祈之至

元皇開度天尊

焚開陰曹符

具位某謹焚香供養北陰泉曲九幽地獄主者二十四大地獄主者八十一大地獄主者

三塗五苦地獄主者大鐵圍山無間地獄主者大鐵圍山硤石地獄主者大鐵圍山血湖地獄主者翻體六神擲尸神王食心啖腦鬼王百萬鬼卒等衆城隍社令囚禁攸司一切主者仗此寶香普同供養伏以八紘九極班

聯赫奕於冥曹萬劫千齡罪對權衡於陰府
宣化稟彤墀之令持平敷赤縣之仁奮威神
而御黔黎雖秋霜之凜若昭憲章而定善惡
亦冬日之溫如受中以生惟人爲貴焚天和
於五賊循人欲於三彭生也有涯孰念分靈
坐十
之祖炁死而後已難逃置對於元辰況茲苦
海之飄沉莫甚血湖之腥穢是以玄元啓運
雲錦開囊龍章昭三炁之符鳳篆燦五元之
令煥恩綸於九地玉籙流光凝道炁於三天
金真演教庸啓然燈之式以爲度命之階今

齋主某伏為亡故某普及十方一切產魂蒲
柳微生荆麻弱質宿命倏罹於產厄夭魂未
離於血尸恭按齋盟恪修妙範沙鋪獄壘圜
扉法象於鐵圍燈列慧光寶炬開明於硤石
伏願冥官赦罪考吏停刑體上帝之好生矜
一愚之趨死化血湖作清涼之沼道炁周流
變苦具為寶騫之林靈光洞煥俱被晨陽之
照悉超寒夜之鄉某不勝虔祝之至稽首皈
依无極大道

大聖元始天尊

大聖靈寶天尊

大聖道德天尊

三尊聖號萬劫難聞九壘冥曹一心皈命準
天尊之玉敕降破獄之金符開赦幽關放拔
罪爽剋時定令風火無停謹伸關啓靈寶青

坐十

七

玄持符破獄一行官吏疾請駕空馭景來赴
玄壇恭按天符下開地獄遂齋主皈依之悃
宣帝真化育之仁所有太上敕破血湖符命
依科告下

宣符

關發

衆誦隱語旋繞

元皇開度天尊

引至無間獄前

焚慧光符

謹按經云酆都大鐵圍山之南別有一獄號
曰無間世人造罪死入其中奚分男女貴賤
之殊均受水火陰陽之考一晝一夜萬死萬
生盡大地投芥拂石之期絕終天乘昏凌空
之望陽耀弗燭常赦不原今有齋主某資薦
亡故某普及一切產魂稱揚金容聖號然點

玉籙神燈假此慧光照彼幽獄俾諸罪爽咸
覩陽明悟多生恣情縱欲之愆爲善最樂迴
一點受中命靈之性與道合真北鬱削名南
宮受化仗茲無盡功德開度係薦亡靈清衆
運誠玉音讚嘆

仰啓三天主 元皇無上尊 願臨無間獄
開度產亡魂和往生神仙界

法師執策杖行持

焚迴光符

鐵圍南際列層城 無間幽牢考吏明

上翊九霄司禁律 下提八極職章程

周旋業網難迴死 了悟玄機定返生

珍重元皇宸澤溥 疾辭黑鬱上朱陵

元皇開度天尊

引詣硤石獄

坐十

焚慧光符

謹按經云大鐵圍山無間地獄東南復有一
獄號曰硤石世人造罪死入其中上大下尖
開一縫而業風攝入中空外固聚百藥而毒
汁周流長夜冥冥終天慘慘坐閱億劫之久

不聞三寶之名今有齋主某資薦亡故某普
及一切產魂稱揚金容聖號然點玉籙神燈
假此慧光照彼幽獄俾諸罪爽咸覩陽明悟
多生污漫水漿之愆慧日破暗迴一點滅除
煩惱之性法雨清塵玉簡上生金書度命仗
茲不盡功德開度係薦亡靈清衆運誠玉音
讚歎

仰啓三天主 元皇无上尊 願臨硤石獄
開度產亡魂和往生神仙界

執策杖行持

焚迴光符

鐵圍硤石鎮幽都

位列東南跨海隅

赫奕威章翻惡簿

紛紛憲令勒刑書

九天煥紫鸞臺耀

十地勾朱犴室虛

珍重元皇宸澤溥

寒池部衛上天衢

坐十

九

元皇開度天尊

引詣血湖獄

焚慧光符

謹按經云大鐵圍山硤石地獄極北之地又有一獄積血成湖號曰血湖世間婦女因產

亡身魂墮其中腥波飛濺而浩渺無涯穢浪
飄流而杳冥莫測帝命弗至天赦罔臨神彰
翻體擲尸之名鬼備啖腦食心之號劫運有
極罪對無終今有齋主某資度亡故某普及
一切產魂稱揚金容聖號然點玉籙神燈假
此慧光照彼幽獄俾諸罪爽咸覩陽明悟多
生觸穢三元之愆名消黑壘迴一點具足五
明之性魂度朱陵飛空步虛登真悟道仗茲
不盡之功德開度係薦之亡魂清衆運誠玉

音讚嘆

仰啓三天主 元皇无上尊 願臨血池獄

開度產亡魂 和往生神仙界

執策杖行持

鐵圍極北血湖牢 宣化威靈職憲曹

雨露無私恩廣大 雷霆有赫業周遭

龍符駕夜周三際 鳳詔乘晨遍八遙

珍重元皇恩澤溥 玉虛光裏任翔翺

元皇開度天尊

歸位誦清靜經

向來神燈破暗丹簡開幽陰庭烜赫於陽光

夜壑昭回於晝景神王稟命獄卒歡顏鐵壁
銅墻化寶節綵幢而接引水池火沼變祥雲
甘露以沾濡荷上聖之提携仰玄真之援拯
伏願亡故某及一切產魂灌沐晨輝澄清業
垢等虛空而更無染着達生生化化之機悟
坐十
真常而不礙去來造有有無無之妙耀驪珠
於滄海朗兔魄於青霄見性成真迴光度命
三塗罷對十極同仁稽首皈依無極大道

念善

靈寶領教濟度金書卷之一百十五

靈寶領教濟度金書卷之一百十六

洞微高士開光救苦真人竊全真授

靈寶通玄弘教水南先生林靈真編

科儀立成品 血湖道場用

請降敕赦玉札立幕頌告儀

壇前立班

步虛

上香

具位臣某誠惶誠恐稽首頓首再拜上言臣
聞化機密運於三天妙陰陽而橐籥帝渥昭
回於萬有極生死以陶鎔永爲硤石血湖之

牢實連無間鐵圍之境終天考對歷劫幽囚
非渙汗於德音曷超凌於滯識今有齋主某
伏為亡故某稟生女質沒命產傷形神穢腥
慮沉淪於幽域冤憎結習難解脫於冥關乞
就玄壇恭依金錄頒元皇之敕赦宣壁魯之

坐十

十一

靈書提彼幽靈來臨陽境重念臣偶緣宿運
叨莅真階幸慶會於風雲羽儀八表盡承宣
於雨露澤潤三塗期敷化育之功密贊生成
之德況茲亡爽實可驚神業蘊客塵隨六入
而六因自現識縈報障墮九夜而九死誰扶

豈無悔過之忱孰導登真之路擬依玉格宣
告金符流三炁而蕩五元赦除業垢煥七星
而開九壘攝取真魂欲望上帝垂矜聖真曲
憫敕下羅酆寒夜泉曲幽庭地水職司城隍
社令依準開度時刻升遷玉龍飛躍於天衢
恩流夜壑金虎奔騰於地域威制冥曹副齋
主激切之忱遂微臣開度之念臣不勝瞻天
望聖激切屏營之至謹伏案前恭伺天恩報
應

拜伏

誦大行梵炁章

三拜起

填赦

侍職喝

上清靈寶玄壇恭奉道旨頒行元皇敕赦三炁流光真符玉元蕩滌血湖真符北斗玄冥

太乙混元玉札開度亡故某及一切產魂地水職司城隍社令冥關幽路主者萬神各宜整肅拱聽宣布

宣流光符

宣血湖符

宣敕赦

宣玉札

吟飛空步虛頌

元皇敕赦煥三天 萬道靈光照九泉

丹鳳銜來承詔渥 金雞飛下湛恩宣

血池化作青蓮沼 艷域翻爲七寶園

草鞠園扉生意溥 幽明萬類盡春妍

坐十

十二

元皇開度天尊

引符簡赦札詣驛吏幕上香

焚香供養三炷流光符吏玉元蕩滌血湖符
吏某日日直天丁地道功曹玄壇承受符檄

合屬真靈恭望聖聰俯垂鑒映伏以清微日

近玉符昭晰於天光驛使風馳金簡開明於
地暗欲普好生之德爰依錫類之仁今有齋
主某資薦某肅建玄壇惠徼洪貺宿寃浩浩
旣因產以傷生幽域沉沉莫登真而度命叩
闔竭蟻忱之切啓局祈鶴赦之頒已荷天休
俯從民欲爰念提携夜壑雖繇丹禁之疏恩
奈何宣唱皇靈尤賴玄曹之贊化諒遵帝敕
來茲齋壇法衆運誠志心奉請

請神

三獻茶酒

步虛

某啓三炁流光符吏玉元蕩滌血湖符吏某
日日直天丁地道功曹玄壇承受符檄合屬
真靈伏以丹鳳自九天而下帝渥敷羅玉龍
遍十地而馳神威赫奕敢忘皈命庸拯傾心

坐十

十三

以今奉爲齋主某痛念亡故某身抱宿冤命
沉產厄血湖浩渺陽光永隔於腥風業海汪
洋天吏不臨於穢浪非由特赦曷俾乘晨朱
章期上帝之同仁白簡荷元皇之大德欲拯
提於魂識實傳送於威靈伏望風馬雲車瞬

息遍黃泉之境金叟鐵騎須臾開黑壤之關
身負恩綸手提仁敕五元滌罪三炁開幽帝
命有嚴神聽毋忽所有牒文謹當宣示

宣天丁牒

宣符吏牒

焚符簡赦

誦上天度人章

壇檄告備玄憲森羅宜疾其驅俾冥曹之敬
聽徑離所部提幽魄以來臨萬累清明一真
呈露其不勝虔祝之至

元皇開度天尊

引玉札至神虎幕上香

焚香供養北魁玄範倒生玄司追攝產魂徐
玉女主行玉札周吳徐三大神靈寶如意萬
司追攝散魂王陸胡徐周李馮七大神九天

普度院追攝產魂桓真人金將軍本靖主將
副將玄壇追攝總局合屬威靈恭望聖慈俯
垂鑒映伏以金書啓運昭回三洞以垂文玉
札破幽主宰七靈而制命法雨欲蘇於黑部
仁風宜賴於清曹今有某資薦亡故某肅建

玄壇惠徼洪貺念次寥艷域沉沉莫覩於晨
陽况腥穢血湖杳杳難離於夜暗惟九天列
普度之將而萬司崇如意之神權統紫英職
尊素渥皆承宣於帝闕以拯拔於幽關綸綍
誕敷已下赦過宥罪之令憲章昭示盍施張

坐十

十四

門毀鎖之威召役有期忱恟是切諒遵玉敕
來莅玄壇法衆運誠至心奉請

請神

三獻

某上啓北魁玄範府九天溥度院靈寶如意

萬司追攝產魂一行官吏主行玉札三大神
本靖主將副將追攝諸大元帥合屬吏兵伏
以東極列飛龍之吏宣德承符北魁立神虎
之司追魂攝魄既列曹而聯事宜協力以書
勛以今伏爲齋主某痛念亡故某質賦女流
命淪產厄業風鼓血湖之浪萬死堪憐慧日
爍鐵網之圍千冤可釋非由神力曷詣玄壇
庸宣壁魯之金章遍告靈虛之玉篆嘯命十
宮六洞提携五苦三塗伏願鐵騎奔雲極風
輪而迅如掣電金戈耀日遵火令而去若流

鈴威制群魔仁敷列壘部衛魂魄脫離幽沉
帝命有嚴神聽毋忽所有牒文謹當宣示

宣諸司牒

焚玉札

誦上天度人章

坐十

十五

壇檄告備天律有嚴攝北艷檢鬼營不得容
隱度南宮除罪籍自在超凌帝有恩言神毋
曠職某不勝虔祝之至

向來頌

立六司幕召魂極治沐浴朝禮儀

壇前序立

步虛

上香長跪

具位臣某誠惶誠恐稽首頓首再拜上言臣
聞下民惡死動之死地而不知上帝好生示
以生方而無已賤彼幽塗之滯魄孰非祖炁
之分靈忍使沉淪或孤化育今有某崇建道
場開度亡故某飛章籲帝頒札追魂諒綸綍
之肆馳救仙靈而受役載惟久淪地暗負隔
天光業對未清形神猶穢五行顛錯百體支

離非資神變以返生難俾超凌而度命欲望
慈悲廣運德澤周流申命有司疾分形而化
景各恭乃事庶體道以度生召役有期忱恂
再露仰希淵默俯賜允俞遂齋主激切之情
副微臣開度之願其不勝虔祝之至再拜謹

言

元皇開度天尊

引詣解結司上香

焚香供養靈寶解冤釋結靈官五經博士能
談善說靈官聚魂攝魄斷邪歸真顯靈大神

震雷開黑絕道生光忠德招義大神分釋冤
對斷結除冤升濟大神九天解冤大神玄壇
解結司一切真衆仰冀威靈特垂鑒映伏以
巍巍閭闔昭宣一視之仁風赫赫班聯參贊
三乘之化雨玄壇羅列丹悃敷宣以今某資

坐十

十六

薦亡故某及一切產魂痛慾海之塵迷冤仇
報對致血湖之波漲形神穢腥非依開釋之
仁曷遂超升之樂朱章靈奏玉敕風馳期飈
馭之從容鋪陳綠席諒威靈之迅邁莅止玄
壇法衆運誠志心恭請

請神

三獻

步虛

某上啓靈寶解結司靈官真衆伏以度生死
海孰操彼岸之慈航越人我山豈賴昏衢之
慧燭亡故某及一切產魂采蘋賦質坐草傷
生慮三生四負之纏縈有萬劫千齡之汨沒
將行攝召來詣司存願劔佩之暫留勒旌旗
而少駐齊同慈愛開黍珠雨露之恩衣被寵
光慶縈闕風雲之會某不勝懇祝之至

元皇開度天尊

引至監生司上香

焚香供養九天監生大神衛房聖母定生大神感化大神變胎大神六甲神吏送生童子送生君順生君速生君全生君南昌分胎功曹主產功曹迴骸功曹起死功曹玄壇監生

坐十

十七

司一切真衆仰冀威靈特垂鑒映伏以仁涵三極企丹闕之天開烝灌九霄煥清曹之星列修齋激切請命勤渠以今某資薦亡故某及一切產魂昧天精天粹之神竒顛冥業海致地魄地魂之臭腐沉滯血湖亶依提拯之

仁庶遂逍遙之樂金符夜下朱刻晨馳期召
役於威靈丹忱昭徹諒鋪陳於儀衛綠輦低
回法衆運誠志心奉請

請神

三獻

步虛

某上啓靈寶監生司靈官仙衆伏以負陰抱
陽生化權衡於二炁出生入死樞機發育於
九天亡故某及一切產魂稟質女流失身產
厄萬劫而穢腥莫滌千生而顛踣誰扶行攝
神儀來參聖幕望慈悲之曲映期鹵簿之遲

留已生未生皆得生契十轉迴靈之妙專度
曲度無不度符九華救苦之仁某不勝懇祈
之至

元皇開度天尊

引至天醫司上香

焚香供養天醫尚藥靈官主辨形候靈官隨
病製藥靈官修合鍛鍊靈官生形博士復肌
主者治病功曹收毒將軍三五功曹敷藥靈
官察脉論病靈官請藥療病靈官砭石小吏
扁鵲官吏仙藥童子玄壇天醫司合屬真衆

仰冀威靈俯垂鑒映伏以天聽無私羅千官
而贊化神功莫測扶三極以同仁齋律有嚴
真忱畢露以今某資薦亡故某及一切產魂
三彭內訌秋風自剪於交梨二豎潛攻朝露
溘先於坐草非皈依於九轉曷平復於一元
坐十
十八
誠籲丹墀恩頒玉敕靈光洞煥玄壇後聯事
之儀梵炁扶搖綠輦簇前驅之仗法衆運誠
志心奉請

請神

三獻

步虛

某上啓靈寶天醫司靈官仙衆伏以地水火
風病不離於四大神聖工巧醫實贊於三才
亡故某及一切產魂緣愛傷生因胎殞命痛
五臟六腑之榮衛未復致三部八景之靈識
莫完行攝神儀來參聖幕期同仁而拯治勒
仙仗以遲留補剝息黥符上品生成之妙迴
尸起死證生天化育之功某不勝懇禱之至

元皇開度天尊

引詣混元司上香

焚香供養玉清混元十二炁化生大將軍玄

壇混元司合屬真靈仰冀威靈特垂鑒映伏
以玉清啓運煥慧日於中天金闕升班布慈
雲於大地聿嚴齋福先控哀忱以今某資薦
亡故某及一切產魂思夜壑莫痛於血湖慨
五神之枯朽乘晨陽雖離於苦海奈九氣之
飛揚非返本以生成曷登真而快樂露章一
奏風驛四馳鑒丹悃之敷羅玄關命駕勒瓊
輪而迅邁紅帟停驂法衆運誠至心奉請命

坐十

十九

請神
三獻

步虛

某上啓玉清混元大將軍一切真衆伏以一
氣周流聚散奚分於生死六陽變化生成密
佐於乾坤亡故某及一切產魂身抱宿冤命
沉產厄諒精神魂魄意之顛頓致金木水火
土之飄零行攝神儀來參聖幕願威靈之暫
駐拯神變之無方理五炁混百神符仙化成
人之妙離三途超八難證登真度命之玄某
不勝虔祝之至

元皇開度天尊

引詣浣濯司上香

焚香供養靈寶沐浴靈官玉清攝魔屏穢靈
官九鳳破穢靈官天河東井君浣濯夫人黃
華玉女石景水母仙花玉女五方五帝解穢
君五靈童子玉女使者九天運穢神君斬穢
神君滅穢神君洗穢神君蕩穢神君四靈解

穢神君玄壇浣濯司一切真衆仰冀威靈特
垂鑒映伏以丹闕端嚴法雨羅敷於象外清
曹赫奕慈風浩蕩於寰中齋列黃壇誠通朱
表以今某資薦亡故某及一切產魂沉淪萬
劫宿根之塵垢紛葩奄忽一朝血湖之穢腥

跋蹇非仗神威之蕩滌曷令魂識之清明一
札心馳九重敕下鋪張六帝諒雲馭之遙臨
提拯黃泉挽天河而曲度法衆運誠至心奉
請

請神

三獻

步虛

坐十

三

某上啓靈寶浣濯司靈官真衆伏以定水湛
八解之池澄清業垢玄泉灌五靈之液蕩滌
心塵亡故某及一切產魂身列女流命沉產
厄慮性識縈纏於腥穢而魂靈漬染於腥臊

將攝神儀來參聖幕願從容於仗衛祈灌沐
於精華九鳳徘徊挹東井方諸之粹五龍橐
籥注南宮流汨之英某不勝虔祝之至

元皇開度天尊

引至巾笥司上香

焚香供養靈寶巾笥司靈官青玄金木仙衣
玉女仙帶玉女仙車玉女冠帶仙官一切真
衆仰冀威靈垂慈鑒映伏以清微下度人之
令十極歸仁靈寶列如意之曹萬司贊化玄
壇肇啓丹烟潛孚以今某資薦亡故某及一

切產魂神淪沒於血湖衣裳腥穢識浮沉於
業海容止恓惶期衣被於天光盍皈依於神
貺朱章啓奏玉敕宣傳駐景前帷幸從容於
再宿承流中陛庶蔭覆於九垓法衆運誠志
心奉請

請神

三獻

步虛

某上啓靈寶中笥司靈官真衆伏以冥關鬱
絕九幽杳隔於陽光列職森羅萬劫提携於
陰暗亡故某及一切產魂命淪穢境神墮寒

庭莫全五體之威儀安望六銖之織麗行將
攝召來欸司存願騶御之傾光布繭絲之正
化配乾坤上衣下裳之妙佩服陸離成坎離
陽變陰合之功容儀濟楚某不勝虔祝之至
元皇開度天尊

引詣壇前向門外行催召

靈寶領教濟度金書卷之一百十六共

終



Handwritten text in vertical columns, likely bleed-through from the reverse side of the page. The characters are faint and difficult to decipher but appear to be in a traditional Chinese script.

